

欽定舊唐書

卷百七
十八
八十二

舊唐書卷一百七十八

後晉司空同中書門下平章事劉 昫撰

列傳第一百二十八

趙隱

弟隱光裔

子光逢

張昺

子文蔚昭憲

齊美

李蔚

崔彥昭

鄭畋

盧攜

王徽

趙隱字大隱京兆奉天人也祖植建中末朱泚之亂德宗幸奉天時倉卒變起羽衛不集數日間賊來攻城植以家人奴客奮力拒守仍獻家財以助軍賞天子嘉之賊平咸寧王渾瑊辟爲推官累遷殿中侍御史貞元初

遷鄭州刺史鄭滑節度使李融奏兼副使十年融病軍府之政委於植大將宋朝宴構三軍爲亂中夜火發植與監軍列卒待之遲明亂卒自潰卽日誅斬皆盡帝優詔嘉之入爲衛尉少卿三遷尚書工部侍郎十七年出爲廣州刺史兼御史大夫嶺南東道節度觀察等使卒於鎮子存約滂存約大和三年爲興元從事是時軍亂存約與節度使李絳方宴語吏報新軍亂突入府廨公宜避之絳曰吾爲帥臣去之安往麾存約令遁存約曰苟公厚德獲奉賓階背恩苟免非吾志也卽欲部分左右拒賊是日與絳同遇害隱以父罹非禍泣守松楸十

餘年杜門讀書不應辟命會昌中父友當權要敦勉仕進方應弓招累爲從事大中三年應進士登第累遷郡守尚書郎給事中河南尹歷戶兵二侍郎領鹽鐵轉運等使咸通末以本官同平章事加中書侍郎兼禮部尚書進階特進天水伯食邑七伯戶隱性仁孝與弟隲尤稱友悌少孤貧弟兄力耕稼以奉親造次不干親戚旣居宰輔不以權位自高退朝易衣弟兄待母左右歲時伏臘公卿大臣盈門通訊而大臣及母之榮無如其比乾符中罷相檢校兵部尚書潤州刺史浙西觀察等使入爲太常卿轉吏部尚書累加尚書左僕射廣明中卒

子光逢光裔光胤弟騰亦以進士登第大中末與兄隱並踐省閣咸通初以兵部員外郎知制誥轉郎中正拜中書舍人六年權知貢舉七年選士多得名流拜禮部侍郎御史中丞累遷華州刺史潼關防禦鎮國軍等使卒光逢乾符五年登進士第釋褐鳳翔推官入朝爲監察御史丁父憂免僖宗還京授太常博士歷禮部司勳吏部三員外郎集賢殿學士轉禮部郎中景福中以祠部郎中知制誥尋召充翰林學士正拜中書舍人戶部侍郎學士承旨改兵部侍郎尚書左丞學士如故乾寧三年從駕幸華州拜御史中丞改禮部侍郎劉季述廢

立之後宰相崔角與黃門爭權衣冠道喪光逢移疾退居洛陽閉關却掃六七年昭宗遷洛起爲吏部侍郎復爲左丞歷太常卿鼎沒於梁累官至宰輔封齊國公光裔光啓三年進士擢第乾寧中累遷司勳郎中弘文館學士改膳部郎中知制誥賜金紫之服兄弟對掌內外制命時人榮之季述廢立之後光逢歸洛光裔旅遊江表以避患嶺南劉隱深禮之奏爲副使因家嶺外光脩大順二年進士登第天祐初累官至駕部郎中入梁歷顯位中興用爲宰輔

張昺字公表河間人父君卿元和中舉進士詞學知名

累歷郡守謁會昌四年進士擢第釋褐壽州防禦判官于琮布衣時客遊壽春郡守待之不厚謁以琮衣冠子異禮遇之琮將別謂謁曰吾餉逆旅翁五十千郡將之惠不登其數如何謁方奉母家貧適得俸綰五十匹盡以遺琮約曰他時出處窮達交相卹也謁累辟太原掌書記大中朝琮爲翰林學士俄登宰輔判度支琮召謁爲司勳員外郎判度支尋用爲翰林學士轉郎中知制誥拜中書舍人戶部侍郎學士承旨咸通末琮爲韋保衡所構譴逐謁坐貶封州司馬保衡誅琮得雪謁量移入朝爲太子賓客遷吏部侍郎京兆尹乾符三年出爲

華州刺史其年冬檢校吏部尚書鄆州刺史天平軍節度觀察等使四年卒于鎮時年六十四子文蔚濟美貽憲文蔚乾符二年進士擢第累佐使府龍紀初入朝爲尚書郎乾寧中以祠部郎中知制誥正拜中書舍人賜紫崔胤擅朝政與蔚同年進士尤相善用爲翰林學士戶部侍郎轉兵部從昭宗遷洛陽輝王時拜中書侍郎平章事入梁卒濟美貽憲相繼以進士登第貽憲覆試落籍爲戶部巡官集賢校理

李蔚字茂休隴西人祖上公位司農卿元和初爲陝虢觀察使父景素太和中進士蔚開成末進士擢第釋褐

襄陽從事會昌末調選又以書判拔萃拜監察御史轉
殿中監大中七年以貲外郎知臺雜尋知制誥轉郎中
正拜中書舍人咸通五年權知禮部貢舉六年拜禮部
侍郎轉尚書右丞懿宗奉佛太過常於禁中飯僧親爲
贊唄以旃檀爲二高座賜安國寺僧徹逢八飯萬僧蔚
上疏諫曰臣聞孔丘聖者也言則引周任之言符融賢
者也諫必稱王猛之議誠以事求師古詞貴達情陛下
自纘帝圖克崇佛事止當修外未甚得中臣畧採本朝
名臣啓奏之言以證奉佛初終之要天后時曾營大像
功費百萬狄仁傑諫曰夫寶鏤殫于綴飾瓌材竭于輪

與功不使鬼必在役人物不天來皆從地出非苦百姓
物何以求物生有時用之無度臣每思惟實所悲痛至
如往在江表像法盛興梁武簡文施捨無限及乎三淮
沸浪五嶺騰烟列剎盈衢無救危亾之禍緇衣蔽路豈
益勤王之師況近年以來風塵屢擲水旱失節征役稍
繁必若多費官財又苦人力一隅有難將何以救此切
當之言一也中宗時公主外戚奏度僧尼姚崇諫曰佛
不在外求之于心佛圖澄最賢無益於後趙羅什多藝
不救於姚秦何充符融皆遭敗滅齊襄梁武未免災殃
但志發慈悲心行利益若蒼生安樂卽是佛身此切當

之言二也睿宗爲金仙玉真二公主造二道宮辛替否
諫曰自夏已來淫雨不解穀荒于壠麥爛于場入秋已
來亢旱爲災苗而不實霜損蟲暴草萊枯黃下人咨嗟
未加賑貸陛下愛兩女而造兩觀燒瓦運木載土填沙
道路流言皆云用錢百萬陛下聖人也遠無不知陛下
明君也細無不見旣知且見知倉有幾年之儲庫有幾
年之帛知百姓之間可存活乎三邊之士可轉輸乎今
發一卒以扞邊陲追一兵以衛社稷多無衣食皆帶饑
寒賞賜之間迴無所出軍旅驟敗莫不由斯而陛下破
百萬貫錢造不急之觀以賈六合之怨以違萬人之心

此切當之言三也替否又諫造寺曰釋教以清淨爲基
慈悲爲主常體道以濟物不利己而害人每去己以全
真不營身以害教今三時之月築山穿池損命也殫府
虛藏損人也廣殿長廊營身也損命則不慈悲損人則
不濟物營身則不清淨豈大聖至神之心乎佛書曰一
切有爲法如夢幻泡影如露亦如電臣以爲減雕琢之
費以賑貧人是有如來之德息穿掘之苦以全昆蟲是
有如來之仁罷營葺之直以給邊陲是有湯武之功廻
不急之祿以購清廉是有唐虞之治陛下緩其所急急
其所緩親未來而疎見在失真實而冀虛無重俗人之

所爲輕天子之功業臣實痛之此切當之言四也臣觀
仁傑天后時上公也姚崇開元時賢相也替否睿宗之
直臣也臣每覽斯言未嘗不廢卷而太息痛其言之不
行也伏以陛下深重縑流妙崇佛事其爲樂善實邁前
蹤但細詳時代之安危眇鑒昔賢之敷奏則思過半矣
道遠乎哉臣過忝渥恩言虧匡諫但舉從繩之義少裨
負展之明營繕之間稍宜停減優詔嘉之尋拜京兆尹
太常卿尋以本官同平章事加中書侍郎與盧攜鄭畋
同輔政罷相出爲襄州刺史山南東道節度使入爲吏
部尚書加檢校尚書右僕射汴州刺史宣武軍節度觀

察等使咸通十四年轉揚州大都督府長史淮南節度副大使知節度事乾符三年受代百姓詣闕乞留一年從之四年復爲吏部尙書尋遷檢校司空東都留守東畿汝都防禦使六年河南軍亂殺崔季康詔以邠寧李偁鎮太原軍情不伏以蔚嘗爲太原從事軍民懷之八月以蔚爲太原尹北都留守河東節度觀察等使其年十月到鎮下車三日暴病卒弟綰從兄繪累官至刺史蔚三子渥洵澤渥咸通末進士及第釋褐太原從事累拜中書舍人禮部侍郎光化三年選貢士洵至福建觀察使

崔彥昭字思文清河人父豈彥昭大中三年進士擢第
釋褐諸侯府咸通初累遷兵部員外郎轉郎中知制誥
拜中書舍人再遷戶部侍郎判本司事彥昭長於經濟
儒學優深精於吏事前治數郡所莅有聲動多遺愛十
年檢校禮部尙書孟州刺史河陽懷節度使進階金紫
十二年正月加檢校刑部尙書太原尹北都留守河東
節度管內觀察等使時徐泗用兵之後北戎多寇邊沙
陀諸部動干紀律彥昭柔以恩惠來以兵威三年之間
北門大治軍民歌之考滿受代耆老數千詣闕乞留詔
報曰彥昭早著令名累更劇任入司邦計開張用經緯

之文出統藩維撫馭得韜鈴之術自臨并部隱若長城
但先和衆安人不欲恃險與馬遂致三軍百姓瀝懇同
詞備述政能唯恐罷去顧茲重鎮方委長材旣獲便安
未議移替想當知悉僖宗卽位就加檢校吏部尚書時
趙隱高璩知政事與彥昭同年進士薦彥昭長於治財
賦十五年三月召爲吏部侍郎充諸道鹽鐵轉運使乾
符初以本官同平章事判度支先是楊收路巖韋保衡
皆以朋黨好賂得罪蕭倣秉政頗革前弊而彥昭輔政
數月百職斯舉察而不煩士君子稱之二年因其轉官
僖宗誠曰彥昭歷試有勞僉諧無媿涉於六月秉是一

心修乃文可以興文教勵乃武可以成武功重整前規
兩司大計清能壁立政乃風行姦欺屏絕於多岐請託
銷摧於正議不煩內庫有助涓毫不假外藩有進絲髮
軍食所入餘剩於明年郊廟所供克辦於今歲頗符神
化真謂廟謀不有良臣安能富國宜酬勲於黃閣俾正
位於紫垣敬服誠詞永堅茂業嗚呼秉鈞之道何所難
哉覆車之塗近已多矣與其樹黨不若修身與其收恩
不如秉直買暫勝者貽其永敗沽小智者囊其大愚不
貴及人唯爭自我初誠潤屋尋以危家金玉滿堂莫之
能守縱經營而得位用枉撓而當辜唯爾選自朕心採